

आकाशवाणी

- प्रधानमंत्री नरेंद्र मोदी होंरें आखेआ जे भारत गी अगले 10एं बरें च आर्थिक तौर पर आत्मनिर्भर बनना होग तां जे आलमी सतह दे हालात दा स्हाड़े देसै पर मता असर नेई होए।
- रक्षा मंत्री राजनाथ सिंह होंरें आखेआ जे 2023-24 बरे च मुख्य दा रक्षा निर्यात पैहली बारी 21 ज्हार करोड़ रपे दे आंकड़े गी पार करी गेआ ऐ।
- केंद्रीय गृह मंत्री अमित शाह होंरें पच्छिम बंगाल, असम ते मणिपुर च तूफान करी होए दे बड़े मते नुकसान मगरा उत्थुआं दे मुखमंत्रिएं कन्ने गल्ल कीती।
- वस्तु ते सेवा कर जीएसटी दा सकल राजस्व इस बरे दे मार्च च सालाना आधार पर 11 फीसद दे बादे कन्नै इक लक्ख 78 ज्हार करोड़ रपे दा होआ।
- दिल्ली दी इक अदालतै कथित आबकारी नीति घोटाले आले मामले च दिल्ली दे मुखमंत्री अरविंद केजरीवाल होंरें गी 15 अप्रैल तगर न्यायिक हिरासत च भेजी दित्ता।

<><><><><><>

PM-RBI

प्रधानमंत्री नरेंद्र मोदी होंरें आखेआ ऐ जे भारत गी अगले 10एं बरें च आर्थिक तौर पर आत्मनिर्भर बनना होग, तां जे आलमी सतह दे हालात दा स्हाड़े पर मता असर नेई पवै। भारती रिजर्व बैंक दे 90 बरे पूरे होने दे मौके पर मुम्बई च आयोजित समारोह च प्रधानमंत्री होंरें आखेआ जे भारत दे बैंकिंग खेत्तर च बड्डा बदलाव आया ऐ ते एहू शोध दा विशे ऐ। उनें आखेआ जे पिच्छले दहाके च उंदी सरकार ते आर.बी.आई आस्सेआ पुट्टी गेदी गैहीं कारण बैंकिंग खेत्तर लाहू आहली स्थिति च ऐ। उनें आखेआ जे सरकारै सार्वजनिक खेत्तर दे बैंकें गी उबड़ा चुक्कने लेई साड्डे 3 लक्ख करोड़ रपें दी पूंजी पाई ऐ। उनें आखेआ जे बैंकें दे डुब्बी गेदे दोआर-कर्जे जेहड़े 2018 च 11 इशारिया 2-5 फीसद हे, ओहू पिच्छले बरे सितंबर तगर घटियै 3 फीसद शा बी घट्ट रेही गो। उनें आखेआ जे इस किस्मै दिएं उपलब्धिएं च आर.बी.आई नै बडी महत्वपूर्ण भूमिका निभाई ऐ। प्रधानमंत्री होर शैहरा दे इक दिनै दे दौरे पर हे। आर.बी.आई नै पैहली अप्रैल 1935 गी कम्म करना शुरू कीता हा।

◇◇◇◇◇◇◇◇

Rajnath-Defence

रक्षामंत्री राजनाथ सिंह होंरें आखेआ ऐ जे बरे 2023-24 च मुख्य दा रक्षा निर्यात पैहली बारी 21 ज्हार करोड़ रपे दे आंकड़ें गी पार करी गेआ। सिंह होंरें सोशल मीडिया पर इक पोस्ट च आखेआ ऐ जे रक्षा निर्यात च पिच्छले बरे दे मुकाबले च 32 फीसद सोयां मता बाद्दा दर्ज कीता गेआ ऐ। उनें आखेआ जे रक्षा मंत्रालय नै भारत दे रक्षा साजो-समान दे निर्माण ते निर्यात गी बदाने आस्तै केई गैंड पुट्टियां ना। रक्षा मंत्री होंरें आखेआ ऐ जे निजी क्षेत्र ते रक्षा सार्वजनिक उपक्रमें सनें मुख्य दे रक्षा उद्योग नै हाल दे बरे च शानदार प्रदर्शन कीता ऐ।

◇◇◇◇◇◇◇◇

ECI-Ghosh

चुनांऽ आयोग नै महिलाएं खलाफ अपमानजनक टिप्पणी आस्तै भारती जनता पार्टी सांसद दलीप घोष ते कांग्रेस नेता सुप्रिया हुंदी निंदेआ कीती ऐ। आयोग नै पच्छिम बंगाल दी मुखमंत्री

ममता बनर्जी हुंदे खिलाफ भाजपा सांसद दलीप घोष हुंदे बयान दी सख्त निंदेआ कीती। आयोग नै घोष होरें गी चेतावनी दिती जे आदर्श आचार संहिता लागू ऐ, इस करी सार्वजनिक बयान दिंदे होई सावधानी बरतन। आयोग नै अपने बयानै च आखेआ ऐ जे इनें दौनें नेताएं व्यक्तिगत टिप्पणियां करिए आदर्श आचार संहिता दे प्रावधानें दी खलाफवर्जी कीती ऐ।



BJP-ECI Rahul

लोकसभा चुनांऽ च भारती जनता पार्टी पर संड-गंड दा आरोप लाने दे मामले च भारती जनता पार्टी नै कांग्रेस दे वरिष्ठ नेता राहुल गांधी खिलाफ चुनांऽ आयोग च शिकायत दर्ज कीती। भारती जनता पार्टी दे वरिष्ठ नेता ते केंद्री मंत्री हरदीप सिंह पुरी हुंदी अगुवाई च पार्टी दे इक प्रतिनिधिमंडल नै गांधी हुंदे भारतीय लोकतंत्र गी कमजोर करने दे आरोपें कन्नै ई.वी.एम मुद्दें कन्नै सरबंधित टिप्पणियें दी बी आयोग गी जानकारी दिती। दिल्ली च चुनांऽ आयोग कन्नै बैठक मगरा मीडिया कन्नै गल्लबात करदे होई पुरी होरें राहुल गांधी हुंदे पर बड़े गै हेठले स्तर दी राजनीति करने दा आरोप लाया। इस मामले च उनें कांग्रेस नेता पर सख्त कार्रवाई करने दा आग्रह कीता। दिल्ली दे रामलीला मैदान च विपक्ष दी रैली गी संबोधित करदे होई कांग्रेस नेता राहुल गांधी होरें कथित तौर पर आरोप लाया हा जे बीजेपी ई.वी.एम, संड-गंड ते केंद्री एजेंसिएं बगैर लोकसभा चुनांऽ नेई जित्ती सकदी।



Shah-Storm CM

केंद्री गृह मंत्री अमित शाह होरें पच्छिम बंगाल, असम ते मणिपुर च तूफान करी होए दे बड़े मते नुकसान मगरा उत्थुआं दे मुखमंत्रिएं कन्नै गल्ल कीती। उनें हर संभव सहायता दा भरोसा दोआया। इक सोशल मीडिया पोस्ट च शाह होरें आखेआ जे ओहू तूफान करी होए दे बड़े मते नुकसान करी बड़े मते चिंतित ना। उनें मारे गेदे लोकें दे परोआरें प्रति संवेदना जाहिर कीती ते घायलें दे तौले नरोए जाने दी कामना कीती।



SC-Gyanvapi

सुप्रीम कोर्ट नै वाराणसी अदालत दे 31 जनवरी दे उस आदेश पर रोक लाने थवां इंकार करी दिता ऐ जेदे च हिंदू समुदाय गी ज्ञानवापी मस्जिद दे दक्खणी तहखाने च पूजा दी इजाजत दिती गेई। भारत दे मुख न्यायाधीश डी.वाई चंद्रचूड ते न्यायाधीश जे.बी पारदीवाला ते मनोज मिश्रा हुंदी खंडपीठ नै दौनें पक्खें गी आदेश दिता ऐ जे ओहू ज्ञानवापी परिसर च यथास्थिति बनाई रक्खन तां जे दौनें समुदाय उत्थे धार्मिक प्रार्थना करी सकन। अदालतै आखेआ ऐ जे हिंदू दक्खन रनाएं प्रवेश करिए तहखाने च प्रार्थना करडन ते मुस्लिम उत्तर थवां प्रवेश करिए नमाज अदा करडन। एहू बवस्था मामले दा अखीरी फैसला होने तगर जारी रौहगा।



GST-Collection

वस्तु ते सेवा कर जीएसटी दा सकल राजस्व इस बरे दे मार्च च सलाना आधार पर 11 फीसद दी बढत कन्नै इक लक्ख 78 ज्हार करोड़ रपे दा होआ। मार्च सब्बनें थवां मता जी.एस.टी. किट्टु करने आला दुआ म्हीना रेया। केंद्री वित्त मंत्रालय नै आखेआ ऐ जे घरेलु लैन-देन च 17 अशारिया 6 फीसद दे बाद्दे कन्नै जीएसटी संग्रह च महत्वपूर्ण बाद्दा दर्ज कीता गेआ। पिच्छले माली बरे च जी.एस.टी. संग्रह दा मासिक औसत इक्क लक्ख 68 करोड़ रपे रेआ जेडा एह्दे पिच्छले माली बरे दे 1 लक्ख 50 ज्हार करोड़ दे औसत थवां मता ऐ। मंत्रालय नै आखेआ जे इस

साल मार्च च जीएसटी राजस्व दा शुद्ध रिफंड इक्क लकख 65 ज्हार करोड रपे ऐ जेडा पिच्छले बरे दी इस्सै अवधि दे मुकाबले च 18 अशारिया 4 फीसद मता ऐ।



Court-Kejriwal

दिल्ली दी इक अदालतै कथित आकबारी नीति घोटाले कन्नै जुड़े दे काले धनै गी जायज बनाने दे मामले च दिल्ली दे मुख्मन्त्री ते आम आदमी पार्टी दे नेता अरविंद केजरीवाल होरें गी 15 अप्रैल तगर नयायिक हिरासत च भेजी दित्ता ऐ। माली नियम कायदे लागू करोआने सरबन्धी निदेशालय ई.डी नै केजरीवाल होरें गी जंदी 21 मार्च गी गिरफ्तार कीता हा। ई.डी हिरासत गी अवधि खत्म होने दे बाद केजरीवाल होरें गी अज्ज राउज़ एवेन्यू हेठली अदालत दी विशेष सी.बी.आई जज हुंदे सामने पेश कीता गेआ। एहदे शा पैहले हेठली अदालतै उनें गी 6 दिनें लेई ई.डी. दी हिरासत च भेजेआ हा ते मगरा इस अवधि गी होर 4 दिनें लेई बी बधाय़ा हा। केजरीवाल होर एहदे शा पैहले ई.डी. आस्सेआ भेजे गेदे 9 समन दी अनदिक्खी करी चुके दे हे। आम आदमी पार्टी दे नेता मनीष सिसोदिया ते संजय सिंह बी इस मामले च आरोपी न ते फिलहाल जेल च बंद न।



BJP-Manifesto Meeting

भारती जनता पार्टी दी चुनां घोषणा पत्र कमेटी दी अज्ज नमीं दिल्ली स्थित पार्टी मुख्यालय च बैठक लग्गी। बैठका च कमेटी नै पार्टी दे चुनां घोषणा पत्र दे बारे च तफसीली सोच विचार कीता। 27 म्बरी कमेटी दी इस पैहली-पैहली बैठक दी अध्यक्षता बीजेपी दे सीनियर लीडर ते केंद्री मंत्री राजनाथ सिंह होरें कीती। बीजेपी चुनां घोषणा पत्र कमेटी दियां कन्वीनर केंद्री मंत्री निर्मला सीतारमण होर न जिसले जे पीयूष गोयल होरें बी एहदे सह-कन्वीनर बनाए गेदे न। तोआई कांग्रेस दी बी केंद्री चुनां कमेटी दी अज्ज नमीं दिल्ली च बैठक लग्गी जेदे च लोकसभा चुनां लेई तेलंगाना लेई मेदवारें दे नाएं बारै सोच विचार कीता गेआ। मीटिंगै च पार्टी प्रधान मल्लिकार्जुन खड़गे हुंदे अलावा पार्टी दियां सीनियर लीडर सोनिया गांधी, तेलंगाना दे मुख्मन्त्री रेवंथ रेड्डी बी मजूद हे।



Home Secy. BCAS

केंद्री गृह सचिव अजय कुमार भल्ला होरें मजूदा समें च नमिएं तकनीकें राएं पैदा होने आले सुरक्षा खतरें कोला आगाह करदे होई मता सौहगा ते सतर्क रौहने लेई आखेआ ऐ। अज्ज नमीं दिल्ली च सिविल हवाबाजी सेवाएं सरबन्धी ब्यूरो यानि ब्यूरो ऑफ सिविल एविएशन सर्विसेज दे 38में स्थापना दिवस दे मौके पर भल्ला होरें आखेआ जे आर्टिफिशियल इंटेलिजेन्स, ग्लोबल पोजीशनिंग सिस्टम जैमिंग ड्रोन ते साइबर खतरे मती परेशानी पैदा करा करदे न। उनें इनें खतरें कोला सुरक्षा यकीनी बनाने लेई सांझे ते सामूहिक जत्तें दी जरूरतै पर जोर भरदे होई ब्यूरो गी नमिएं तकनीकें ते प्रौद्योगिकिं कन्नै लैस रौहने दा निर्देश बी दित्ता।



NC-Candidate

नेशनल कांफ्रेंस नै अपने वरिष्ठ नेता मियां अलताफ अहमद होरें गी अनंतनाग-राजौरी लोकसभा सीट लेई अपना मेदवार घोषित कीता ऐ। पार्टी दे उप-प्रधान उमर अब्दुल्ला होरें श्रीनगर च सीनियर पार्टी नेताएं दी मौजूदगी च एह ऐलान कीता। उमर होरें मियां अलताफ अहमद हुंदी

लोकप्रियता दा जिक्र करदे होई एह विश्वास बी जताया जे उनेंगी बड़ा मता सैहयोग ते समर्थन मिलोग। हदबंदी दी प्रक्रिया दे बाद हुन अनंतनाग हल्के च राजौरी ते पुंछ जिलें गी शामिल कीता गेदा ऐ ते इस हल्के च लोकसभा चुनाएं दे त्रीये गेड़ तैहत 7 मई गी मतदान होग। त्रीये गेड़ दे चुनांऽ लेई अधिसूचना 12 अप्रैल गी जारी कीती जाग ते नामजदगियां दाखल करने दी खीरी तरीक 19 अप्रैल ऐ।

